



**Lauga Autu, Minisita O galuega Tetele a le Malo, Afioga Olo Afoa Fiti Vaai;
Tatalaina Aloa'ia o le Auala Tele mai Saina i Faleata – Faleolo i Aana.**

Ou te muamua ona ta le fatu o le malolo nai le Matamatagi, e faapoipoi lilia ai aua ua le o le malu Fanua, a o le malu o Nuu ma Aiga.

Ua uma ona fola le fau, ua sasa foi le fala, ma ua tea i lagi le fetu tai matagi, o le faasagi lea i le Atua. O lea ua matamio le seuga e pei o le upu ia Saleaamua, aua e leai se toe taputapulalaga i le pau o le taeao.

E manatua i le loto le tala i le Tamaitai o Sina Le Laolao, ao ia laasia paepae o le Maota o le Tagaloaalagi ma le Lagituaiva fai mai, e muamua ona ia faapea ane:- Tulou! Na afua mai i le uluai paepae seia pai atu i le tumutumu, ona ia tootuli lea ma Faatulou.

Tulouna ia le paia ma le mamalu o le afioaga nei;

O Paia lava lea aua le Afio o To'alepaialii, o le Matua i Tofiga o le Aiga Satuala, Maliu mai Vaili o le La'au na Fausia, o le To'oto'o o Ma'auga. Faapea foi le Nofo a Tapuala ma le Lauti-na-Laulelei, ma upu i le Faleaana, Tulou.

Susu lau Susuga i le Taitai o le Sauniga, lau susuga i le Tausi Matagaluega, Umi Pritchard, o le Ekalesia Metotisi i Satapuala,

Afio mai lau Afioga i le Sui Palemia, lau Afioga Tuala Iosefa Ponifasio,

Afifio Afioga I Minisita o le Kapeneta,

Lau Afioga I le Fofoga Fetalai o le Maota Fono, Lau Tofa Li'o Ta'eu Masepau,

Lau Afioga I le Taitai o le Itu e Agaia le Malo, Lau Susuga Tuilaepa Sailele Malielegaoi,

Sui Faipule o le Palemene o Samoa,

Sui mamalu o le Faletupe o le Lalolagi (World Bank) faapea le Malo Ausetalia

Le Taitaifono ma le Komiti Faatonu ma le Pulega o Fela'uaiga i le Laueleele (LTA)

Faauluuluga o Matagaluega ma Faalapotopotoga a le Malo,

Sui o Konekarate ma Konesale ma Kamupani Tumaoti,

Le mamalu o le au valaaulia ua mafai ona tatou potopoto mai leni taeao;

Aemaise le paia o Samoa o faafogafoga ma tapuai mai.

Talofa, Talofa Lava,

E ia te a'u le ava tele ma le migao e tatau ai, ou te faailoa atu ai le tatalaina aloa'ia ai o leni galuega tele a le tatou Malo, I le toe faaleleia ma le toe fausia ai o leni auala i

tulaga faainisinia faaonaponei, mai lava i Saina i le Itumalo o Faleata, seia paia mai Aana Alofi i Faleolo nei.

O lenei Atina'e o se galuega so'oso'otau'au a le Malo ma le Faletupe o le Lalolagi ma ana pa'aga, ina ia siitia ai le Saogalemu ma le Faigofie o Femalagaiga i luga o Auala, ia mafai ona tali atu i suiga ma'ale'ale o le tau, ma ia faa-faigofie ona fe'aveai ma fegasoloai le atunu'u e aga'i mai i le Itu i Sisifo o le Motu o Upolu nei.

Na amata mai lenei galuega i le tausaga e 2019, i le Faiga Malo sa tula'i mai i le foe i lena vaiata, i le silasila mamao lea i le toe siitia ai o le fausiaina o lenei auala ina ia mafai ona tali atu i le faatupula'ia o taavale afi, aemaise o suiga ogaoga o le tau ua iai nei le lalolagi.

E 24 kilomita le umi o lenei auala mai Saina seia pa'ia Faleolo nei, ma o se auala ua matauina le toatele o le atunuu e faaogaina mo femalagaiga, e le gata ia i latou i le atu Aana, Manono ma Apolima, ae faapea foi le atunuu e femalagaai i le va o Upolu ma Savaii, aemaise o le Malae Vaalele Fa'ava-o-Malo i Faleolo nei.

O le tau aofai o lenei galuega e tusa ma le \$115 miliona tala.

- **\$ 101.3** miliona tala na faaaluina i konekarate na fausia le auala;
- **\$ 13.2** miliona tala na faaaluina i galuega tau le tusia o ata ma le mataituina o le faatinoga o le fausaga;
- ia ma le **\$ 0.5 poo le afa** miliona tala na faaaluina mo tau'i o fanua ma mea totino a le mamalu ole atunuu, aua le ausia o lenei faamoemoe

Ma o le aso, ua tatou molimauina ai le taunuuga ma le tatalaina aloaia o lenei Atina'e taua mo Samoa ma ona tagata.

O upu a le atunuu, e le manogi se lolo i se popo e tasi, 'E mama foi se avega, pe a galulue ma tutu faatasi' ma e iai le talitonuga o le Malo, pe ana leai le tutu faatasi, galulue faatasi, le felagolagomai o i latou sa gapatia ma laina ma timuia, o le afaigaluega galulue ma i latou uma sa togi ma'a i lenei galuega, aemaise o le Fesoasoani faifaiepea a le Faletupe o le Lalolagi, ua ausia ai lenei matati'a i ona tulaga maualuga faainisinia i le toe faaleleia ma le fausiaina o auala tetele o Samoa, ma ia ausia ai le manulauti a le Malo, mo ni Femalagaiga Faigofie, Saogalemu ma Vave mo ona Tagata.

Ou te fia Faailoa foi le sao o Paaga ma Matagaluega a le Malo sa fesoasoani ma so'oso'otau'au i le faasoasoina o le tamaoiga mo lenei poloketi taugata, o lo outou sao ua faaalua i lenei faamoemoe taua.

Faafetai faapitoa i Konekarate ma Konesale uma sa Fuafuaina, Mataituina ma Vaava'aia le faagasologa o lenei Galuega, o lo outou tomai faainisinia, ma la outou Tofa-Faale-Atua sa faatonufofau ai lenei Galuega mai lava i le amataga seia oo mai i le taunu'uga lelei ma le matagofie. Malo le Tauatai, malo le galulue, o la outou pule lea.

Faaopoopo se faafetai i le paia ma le mamalu o le atunuu o lo o alala ma papa 'aao i lenei itu o le motu, aemaise foi o tatou tagata o lo o faaogaina lenei auala i aso uma ma taimi uma. Faafetai le lava papale, malo le onosai a o faatino le tatou galuega mai nei tausaga e tele, e talitonu sa faalavelave ma afaina polokalame ma femalagaina a lo outou mamalu a o faagasolo lenei galuega, peitai o la outou lagolagosua ma lo outou finagalo malamalama ua taoto ai i le agatonu ma lagi matagofie lenei galuega, faafetai.

E mauiua o lenei galuega tele, o le a le gata e siitia ai le faigofie o femalagaiga a le mamalu o le atunuu, o le a faigofie le fela'uaiga o oloa ma fefaatauaiga a pisinisi ma tagata lautele, siitia le tali atu i suiga ogaoga o le tau, faigofie le tali atu i faalavelave faafuasei e tutupu mai, i le vave lea ona oo atu o fesoasoani i le mamalu o le atunuu e nonofo i lenei itu o le motu, aemaise lava i lona saogalemu o femalagaina i luga o auala tetele.

Manatua, o lenei galuega ua le na o se Auala fou, ae avea lenei galuega ma pine faamau o le siitia o le tamaoiga o Samoa, o se faailoga o galuega faaauau a le Malo mo le siitia o le soifua laulelei ma le tamaoiga o ona tagata.

O ananafi na fausia ai nei, o nei e fausia ai taeao, o taeao o le lumanai lea mo Alo ma Fanau a Samoa.

Soifua ma ia Manuia.